

# Saeh Seiziq Nanzlumz

武宣县新龙小学五(1)班 Vangz Meijhoz/黄美合

Seiz lwgnyez lumj fuk dozveh ndeu, ndaw dozveh miz bi'ndwen haj saek raeuz; seiz lwgnyez seih diuz go ndeu, ndawde miz vuenyungz raeuz; seiz lwgnyez dwg bonjsaw, ndawde geiq miz saeh nanzlumz raeuz.

Geiq ndaej gou roek bi seizhaenx, gou caeuq daxmeh youq ndaw gyanghonger ganggoj, seizhaenx gou yawjyawj ronghndwen gwnz mbwn, gig geizheih dwk cam: "Vihmaz ronghndwen youq gwnzmbwn mbouj deng doek roengzdaeuj? Dwg mbouj dwg deng Cangzngoz yungh gyauhsuij nem la?"

Daxmeh riu dwk han naeuz: "Wngdang ba?"

"Dahcej Cangzngoz miz gyauhsuij geijlai geizheih ha! De youq gizlawz cawx ne?"

"Neix gou couh mbouj rox lo, mwngz bae cam de ba?"

Gou doiq gwnzmbwn daihsing hemq: "Dahcej Cangzngoz, mwngz bae gizlawz cawx gij gyauhsuij haenx?"

"Daxmeh, dahcej Cangzngoz mbouj han gou."

"Dahcej Cangzngoz ninzndaek lo, gaej cauz de, raeuz hix baema ninz ba."

Gou ninz youq gwnz mbonq fan bae fan dauq ngeix: "Dahcej Cangzngoz vihmaz aeu dawz ronghndwen nem youq gwnzmbwn? Ronghndwen hojlienx lai lo! Cijnwngz youq gwnzmbwn, mbouj ndaej roengzdaeuj caeuq dou guhcaemz." Gou ndawsim gag lwnh swheij, caj ronghndwen doek roengzdaeuj le, gou couh dawz de yo hwnjdaeuj, mbouj hawj dahcej Cangzngoz caiq dawz de daiq baema.

Daj ngoenzhaenx hwnj, moix haemh gou cungj buet bae gyanghonger caj yawj ronghndwen doek

roengzdaeuj mbouj caengz. Miz baez ndeu, gou caj ndaej hozhawq lo, couh bae coh gangraemx aeu raemx daeuj gwn. "Aiyo! Ronghndwen doek ndaw gangraemx lo." Gou daihsing hemq hwnjdaeuj, hoeng youh sikhaek haep bak haeuj, lau Cangzngoz dingqny le youh dawz de daiq deuz. Gou yaemyaem aeu song aen bat, cacaemj dawz ronghndwen lauz hwnjdaeuj, youh sikhaek aeu aen bat wng goemq ndei, lau de buet deuz, gou mienh umj de miemh doiq de gangj: "Ronghndwen ha ronghndwen, gou mbouj dwg vunzvaih, dwg daeuj gouq mwngz, gaej lau." Gou dawz 'ronghndwen' cuengq youq ndaw rug. Hoeng, gou hai daeuj caiq yawj seiz gaenq mbouj raen lo, ndaw bat cij lw miz raemx. Gou simnaiq lai bae ra daxmeh, lwnh daxmeh nyi: "Ronghndwen buet deuz lo, de mbouj haengj caeuq gou guh baengzyoux."

Daxmeh dingq le geizheih dwk cam: "Gyawz miz ronghndwen, de mbouj dwg venj youq gwnzmbwn ma?"

"Mbouj dwg, de doek youq ndaw gang lo." Gou mienh gangj mienh rag daxmeh bae daengz henz gang, fwngz vix dwk naeuz: "Neix mbouj dwg ronghndwen ma?" Daxmeh rox dwg gijmaz saeh lo, daihsing riu hwnjdaeuj naeuz: "Mwngz yawj gwnzmbwn." "Yi, gwnzmbwn vihmaz lij miz aen ronghndwen? Itdingh dwg meh ronghndwen." Daxmeh dingq le riu ndaej sing enggya sang lo, naeuz: "Gwnzmbwn ronghndwen dwg caen, ndaw gang 'ronghndwen' dwg aen ngaeuz de." Gou doiq gij vah daxmeh buenq saenq buenq ngeiz, youh naeuz: "Gang youh mbouj dwg gingq." Gangj sat couh iet gyaeuj yawj ndaw gang bae, mbouj loek,



daxmeh gangj ndaej mbouj loek. Hoeng gou lij siengj dawz ronghndwen gouq roengzdaeuj, gou cijndaej doiq ronghndwen "doiqsied." Gou doiq gwnzmbwn daihsing hemq: "Ronghndwen ha ronghndwen, gou mbouj ndaej gouq mwngz roengzdaeuj, doiq mbouj hwnj lo."

Gienh saeh neix gvaq geij bi lo, haujlai saeh gou cungj lumz ndaej seuqsat, dan miz gienh saeh neix gou geiq ndaej cingcingucuj. A, seiz lwgnyez gou guh saehhuk caen bamz ha! Moix mbat dauqngex hwnjdaeuj, cungj nyaenx mbouj ndaej riu lo.

O! Saeh lwgnyez caen hawj vunz nanzlumz!

(lauxsae son'gyauq: Lungz Gingyi/龙庆煜)

## Ndei Dauq

上林县大丰镇中心学校四(2)班 Cinz Fubinh/陈富斌

Gaxgonq, ndaw ndoeng miz haujlai doenghduz iq. Ndawde noucoengz, bitlwg, malwg dwg baengzyoux ndei, gyoengqde seizseiz guhdoi h guhcaemz.

Miz ngoenz ndeu, noucoengz caeuq malwg itheij dik cuzgiuz. Bitlwg gingvaq gizneix raen le, couh cam: "Gou hix caeuq sou doxcaez guhcaemz, ndaej lwi?" Noucoengz caeuq malwg nyuq deng gwnz ndang bitlwg miz heiq-haeusing, mbouj ngeix saek yaep couh caemh coenz gangj: "Mbouj ndaej, mwngz uq lai lo." Bitlwg naeuz: "Raeuz dwg baengzyoux ndei, baengzyoux ndei wngdang doxgiet doxgyaez, doxhuz youqndei." Noucoengz naeuz: "Mwngz uq lai lo, haeungenge, raeuz caiq mbouj dwg baengzyoux ndei lo." Bitlwg byaij deuz lo, doq byaij bae ranz doq siengsim daejnganga.

Ngoenz daihngieih caeuq ngoenz daihsam, bitlwg cungj mbouj bae ra noucoengz caeuq malwg guhcaemz. De cungj youq ndaw ranz youq mbouj okbae, nyapsaebseab.

Ngoenz daihseiq, bitlwg bae ndaw dah dajcaemx, de aeu dawz bonjfaenh swiq seuqsetset bae, caiq bae ra noucoengz caeuq malwg guhcaemz. Sawqmwh, bitlwg dingqny malwg youq henzhamq swenj: "Gouqmingh ha, noucoengz doek dah lo, gouqmingh ha!" Bitlwg baez dingq le couh rouzri rouzrit ndaem roengz lajraemx bae, dawz noucoengz doz youq gwnz laeng de, soengq noucoengz hwnj hamq bae lo.

Noucoengz ndaej gouq lo, de doiq bitlwg gangj: "Bitlwg, docih mwngz gouq mingh gou,

mboujne gou couh dai youq ndaw dah lo." "Mbouj yungh docih gou, neix dwg gou wnggai guh." Bitlwg han. Malwg hix doiq bitlwg naeuz: "Doiq mbouj hwnj bitlwg, gaxgonq raeuz mbouj wnggai baenzde doiq mwngz, cingj mwngz yienzliengh. Mwngz gangj ndaej deng, raeuz dwg baengzyoux ndei, raeuz dwg baengzyoux ndei, baengzyoux ndei wngdang doxgiet doxgyaez, doxhuz youqndei." Bitlwg naeuz: "Mbouj youq-gaenj, raeuz lij dwg baengzyoux ndei." Gangj sat, sam boux baengzyoux ndei fwngz beng fwngz, doq ciengq doq diuq, vuenheij dangqmaz.

Daj seizneix dauqlaeng, sam boux baengzyoux ndei neix ngoenzngoengz guhdoi h, vaiqvued dangqmaz.

(lauxsae son'gyauq: Vangz Gveiyangh/黄桂香)



## Ndokva Daej Lo

Gyanghaet, vameizgveiq ndaw gyanghonger ok ndok lailai.

Lwgnyez ndwn youq baihnaj ndokva, hemq naeuz: "Boh ha, mwngz daeuj yawj vei!"

Boh daeuj lo.

"Yawj vei, vameizgveiq daej lo, mbouj rox vihmaz ne." Lwgnyez vix ndokva miz raemxraiz de, doeknaiq dangqmaz.

(Daj《Bonjsei Sim Lwgnyez》(Veiz Giz-linz raiz) senj okdaeuj, Lwgfwnzgmeh/卢奋长 hoiz)